

Date – 16/06/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Mizorama tlawmngai pawl lian ber YMA ni, YMA Day vawi 89-na nimin kha YMA Branch hrang hrangin hlim leh uar takin an hmang.
2. Central YMA President Pu Lalhmachhuana'n ruihhlo leh sualna hrang hrang dona kawngah YMA chuan tha thlah lovin theihtawp a chhuah zel dawn, a ti.
3. Infiamna kawnga mi hlawhtling ni tura thalaite chher chhuah chu Mizoram sawrkar tum pawimawh ber a nih thu Sports Minister Pu Lalnghinglova Hmar in a sawi.
4. Union Home Minister Amit Shah-a hoin vawiin hian sorkar mi pawimawhte'n Jammu and Kashmir-a venhimna dinhmun leh Amarnath Yatra atana inbuatsaihate an thlirho dawn.



YMA DAY

Mizorama tlawmngai pawl lian ber YMA ni, YMA Day vawi 89-na nimin kha YMA Branch hrang hrangin mahni remchan dan anga hun hman dan tur siamin hlim leh uar takin an hmang.

Zing kar atangin branch hrang hrangin mahni veng chhung tifaiin hnatlang an thawk a; Central YMA chuan he ni pual hian Damdawi in leh Home hrang hrangah chibai bukna an lo hlan kual tawh a. Aizawl leh a chhehvelah sawrkar leh Kohhran Damdawi inah Cheng 15,000 theuh an hlan a, Home pathum ah buhfai an hlan bawk a. Heng bakah hian ram chhunga state hrang hranga Mizo Welfare 16 hnenah Cheng 15,000 theuh an hlan bawk.

Chief Minister Pu Lalduhoma pawhin Biate Branch YMA-in YMA Day an lawmna, Zialung Community Hall-ah a hmanpui a. Chief Minister chuan khawtlang nunah chona a tam hle tih sawiin khaw tin leh veng tin branch YMA ten mahni zawnah theihtawp chhuaha an beih let loh chuan ram leh hnam tichhe thei thil an ni, a ti a. Tui leh leilung enkawl danah insiamthat a ngai a, nun thlahdah vanga naupang taka thihna te, nupa inthenna te, HIV/AIDS te, Cancer te a tam hle a, ruk ruk a hluarin, thalai vakrawlai an tam tual tual tih a sawi a. Pi leh pute atanga Mizo te'n an neih, zo nun ze mawi te a boral nasa tih sawiin din thar leh turin mipui a sawm a ni.

Nimin YMA Day thilpek atan ITI Veng Branch YMA chuan an veng mi Pi Lalduhawmi in an sak thatsak a. Nimin khan an in sak thatsak hi Central YMA President Pu Lalhmachhuana'n a hawng a ni.

Mamit District-ah pawh YMA Day member ten hlim takin an hmang hlawm a. YMA Day pual hian Sub-Hqrs YMA Mamit chuan hmun hrang hrangah thilpek a pe chhuak a ni.

Saitual khawpuia YMA Branch 9 te pawhin nimin YMA Day kha uar takin an hmang a. Branch hrang hrang hman dan a inang lo va, vantlang tana thil tha tih nan te, midang tanpuina ni atan te, intihsiakna leh intihhlimna lam hawia hman te a ni hlawm a, tlai lama ruai nena lawm branch a tam zawk an ni a, zanin thlenga programme hmang tur an awm bawk.

Champhai District-a YMA Branch thenkhat chuan Zirtawp zan atang khan YMA Day lawmna hun an hmang tan tawh a; Champhai Sub-Hqrs. YMA hruaitute chu hmun hrang hrangah insem darhin YMA Day lawmna an hmanpui a. Champhai Sub-Hqrs. YMA hruaitute chuan rilru leh taksa lama harsatna neite dahkhawmna Home hrang hrang, Jail leh District Hospital a awm te hnenah YMA Day pualin tangkafai Cheng 32,000 an hlan a ni.

AH & Vety.Minister Pu C. Lalsawivunga chuan East Tuipui biala Vaphai khuaah YMA Day a hmanpui a. Adviser to Chief Minister Pu TBC Lalvenchunga, Aizawl West-I MLA chuan Champhai District-a Kelkang khuaah YMA Day lawmna hi a hmanpui.

Kolasib khaw chhunga YMA Branch 21 te pawhin YMA Day urhsun leh hlim takin an hmang a. Branch tam zawk chuan zing karah veng chhung thenfai hnatlang thawkin Branch thenkhat chuan thing tiak an phun.

Tukthuan eikhamah Branch tam zawk chuan YMA Day pual infiammna leh intihhlimna te neiin, Section YMA intihsiakna an nei a, Branch thenkhat chuan Kumpulan thupui 'Ram leh Hnam humhalh' tih hmangin thusawi an ngaithla.

Kolasib Sub-Hqrs YMA Office Bearer te chuan chuan nimin khan YMA Day pualin Kolasib-a Hospital pahnih leh Home pathumah tanpuina pawisa faiCheng 3,000 theuh an hlan.

Serlui bialtu MLA Pu Lalrinsanga Ralte chuan Vairengte Jt.YMA buatsaih YMA Day vawi 89-na chu Vairengte Branch YMA 10-in a huhua Jt. YMA Field-a an hman a hmanpui.

YMA Day lawmna hi ruah sur tam avangin tum anga kalpui thei lo an awm nual bawk.

Nimin YMA Day kha Mizoram hmun hrang hranga awm Assam Rifles-te pawhin thil tha tih ni atana lo hmang vein Aizawl Zokhawsangah thing an phun a; Khawbungah YMA member cxhawimawi phu te chawimawiin Siaha-ah a mamawh apiangte hman turin thisen an pe a ni.

<><><>

CENTRAL YMA PRESIDENT

Central YMA President Pu Lalhmachhuana'n YMA member zawng zawngte leh Zohnahthlak unau zawng zawngte YMA Day Chibai bukin YMA chu pawl ropui tak leh thianghlim a nih ang ngeiin YMA-ah theihtawp chhuaha tan la thar leh turin YMA member zawng zawngte a chah.

Nimin YMA Day puala Akashvani palaiin a kawmnaah CYMA President chuan YMA chuan a bul tantute atanga tun thlengin hma a la sawn zel a, YMA member Nuai 4 Sang 9 leh 601 an awm mek te, Group YMA 50, Sub Headquarters 8 leh Branch 821 a awm ta chu a bul tantute, YMA hruaitute leh member, veng tin leh khaw tina tanlatute avang a ni, a ti a. YMA chu tlawmngai pawl, politics rawngkai lo a nih ang ngeiin a thil tum leh a thu vawn te chu vawiin YMA Day-ah hian YMA member ten an chian thar leh a ngai, a ti a. Kumtluana YMA member-te'n tanpui ngaite tanpuia rim taka an thawh thin laia sorkarin a bika YMA Day meuh a puang

chu sorkar chungah a lawm thu a sawi a. YMA Day-ah hian Mizo nihna angin mahni thenawm khawvengah harsatna tawk leh tanpui ngai an awm leh awm loh dap chhuaka tanpui ngaite tanpui turin mi tin a sawm a ni.

Ram leh hnam humhalh tura YMA-in theihtawp a chhuah thin thu pawh sawiin Central YMA President chuan ruihhlo leh sualna hrang hrang dona kawngah te, abikin thalaite'n nun kawng dik lo an zawh tur vennaah te YMA chuan nasa takin hma a la thin a, tha thlah lovin theihtawp a chhuah zel dawn, a ti a. Sual dona kawnga thawhpui tur mimal leh pawl an awm a nih chuan YMA-in thawhpui theih loh a nei lova, rm leh hnam thatna atan chuan ken an pen zel dawn, a ti a. Hma an lak tawhna zawng zawng tha thawhtu mimal leh Branch hrang hrangte chungah lawmthu a sawi a ni.

YMA-ah Zohnahthlak zawng zawng an leng vek a; Central YMA chuan Inpui an nih inhriain hnam peng hrang hrangte tan YMA Kawngkapui chu a inhawng reng a, pawl leh chi anga inlak hran tha an ti ngai lo tih Central YMA President chuan asawi. Tun hnaia Manipur leh Myanmar-a Zohnahthlak harsatna tawkte YMA-in a theih ang anga lo tuamhlawma an lo tanpui tawh thin thu pawh sawiin, hma lam hunah harsatna a lo thleng a nih pawhin YMA chu a tlanche ngai dawn lova, Zohnahthlakte tan a ding reng dawn a, Zofate INpui a nihna hi a vawng nung reng dawn a ni, a ti.

Ruihhlo bakah tunlai khawvel changkannain a ken tel thiamna leh khawthlang nunphung te'n Mizo thalaite a nuai mek lai hian Mizo takin a changkan theih a, Mizo takin ropui theih tih sawiin Pu Lalhmachhuana chuan Mizo nun ze mawi vawng nung turin Mizo thalaite leh mipui a chah a. Vawiin YMA Day-ah hian damdawi ina awm mek te, do hneh loh neih vanga khung hran ngei te leh Mizoram pawna zohnahthlakte tan YMA chuan chhawmdawlna pein a luang chhuak mek tih pawh sawiin Central YMA President chuan YMA chuan a kuangkua thui zel dawn a ni, a ti.



SPORTS MINISTER

Sports Minister Pu Lalnghinglova Hmar chuan thalaite infiamna kawnga mi hlawhtling ni tura chher chhuah chu Mizoram sawrkar tum pawimawh ber a nih thu sawiin, National Level mai bakah International Level-a thangchhuah thei turin thalai infiammite tan sorkarin tan a la mek tih a sawi.

He thu hi nimina ‘Kukkiwon Advanced Taekwondo National Poomsae Seminar Training’, Govt. Mizo High School Multipurpose Hall, Mac Donalh Hill-a kharna hun a hmanpuinaah a sawi a. Kum 2036 Olympics-ah chuan Mizo thalaite thahnem tak India ram awiawha an tel theih nan leh medal hlu tak an rawn hawn ngei theih nan tun atang hian hmachhawp mumal tak nen hma lak tum a nih thu a sawi.

Mizote chu a tlangpuiin a tirah an phur hlut a, an peih rei thin lo chu a pawl a ni, a ti a; National leh International level-ah mi ti tak takte nen an inel tawh thin si a, tihtaktakna a ngai tawh a, chumi ti thei lo tur chuan bansan mai a tha zawk, tiin thalai kalkhawmte chu taimakna leh tumruhna, insumtheihna leh dawhtheihna nen theihtawp chhuah turin a fuih a ni.

Seminar Training hi Taekwondo Federation of India buatsaih niin Mizoram Amateur Taekwondo Association (MATA) in a thleng a ni.

<><><>

UNION HOME MINISTER

Union Home Minister Amit Shah-a'n vawiin hian High Level meeting a kaihruai dawn a, Jammu and Kashmir-a venhimna dinhmun leh Amarnath Yatra atana inbuatsaihate an thlrho ang.

Thutkhawmah hian J&K Lieutenant Governor Manoj Sinha, National Security Advisor Ajit Doval, Union Home Secretary, Army, Police, J&K administration atanga senior officer leh midangte an tel dawn a ni.

Nimin khan Amit Shah hian New Delhi-a Ministry of Home Affairs-a senior officer-te a kawmnaah Jammu and Kashmir venhimna dinhmun an lo thlrlet tawh bawk a ni.

<><><>

<><><>